

Pelajar Lelaki Perlu Menggandakan Usaha Untuk Ke Universiti - Rosmah Bernama
14 September 2011

KUALA LUMPUR, 14 Sept (Bernama) -- Isteri Perdana Menteri Datin Seri Rosmah Mansor menyeru pelajar lelaki menggandakan usaha untuk mendapat tempat masuk ke universiti.

Beliau berkata jurang perbezaan di antara pelajar lelaki dan perempuan di universiti tempatan amat ketara.

"Hanya 37 peratus pelajar lelaki berjaya melanjutkan pelajaran ke universiti berbanding 63 peratus pelajar perempuan.

"Apa yang penting, para pelajar akan diberi motivasi untuk sentiasa berusaha mencapai keputusan terbaik dalam pelajaran dan seterusnya berjaya menjejakkan kaki ke universiti dalam mengatasi jurang perbezaan itu," katanya.

Rosmah berkata demikian dalam ucapannya sebelum melancarkan Program Selangkah ke Universiti di Dewan Tunku Canselor, Universiti Malaya (UM) yang berlangsung selama sehari, di sini.

Seramai 520 pelajar tingkatan empat berbilang kaum dari 14 buah kawasan Parlimen di Selangor dan Wilayah Persekutuan dipilih mengikuti program anjuran Badan Amal dan Kebajikan Tenaga Isteri-isteri Menteri dan Timbalan Menteri (BAKTI), Kementerian Pengajian Tinggi dan 11 Institusi Pengajian Tinggi Awam (IPTA).

Rosmah yang juga Yang Dipertua BAKTI berkata program itu melambangkan keprihatinan Bakti mengenai kemajuan dan kejayaan akademik di kalangan pelajar sekolah selain dapat mewujudkan sebuah masyarakat yang berpengetahuan, terdidik dan cemerlang.

Selain itu, beliau menyeru ibu bapa dan masyarakat agar sentiasa memimpin dan membantu mengembangkan bakat para remaja agar mereka menjadi insan yang berguna pada masa depan.

"Remaja yang memiliki potensi dan bakat harus diasuh dan dididik dengan sempurna supaya dapat memberi sumbangan kepada keluarga, masyarakat dan negara," kata beliau.

--BERNAMA

Hakcipta © 2011 BERNAMA

Source: <http://www.bernama.com/bernama/v5/bm/newsgeneral.php?id=613574>